

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

ME 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws


MAOTA FOU PULEGA GAGA'EMAUGA I MALUA



FAAILOGA ASO SA TINA 2020



EFKS ULULOLOA & SIUSEGA



Siaosi & Perelini Leleimalefaga FS

O LE FAASINO UPU

1. O LE LAUGA	2
2. PULEGA GAGAEMAUGA	4
3. LAUGA ASO SA TINA	4
4. NA O AFIGA E TULEI MAI	6
5. MANATU AUTU FONOTELE 2020	7
6. FAAFETAIMO LE TOTO	9
7. FAAMAVAE FAIFEAU PENISIONE	10
8. OSI FEAGAIGA EFKS FAGAFAU	10
9. O AU AFIGA O LE SULU	11
10. ITULAU MO TUPULAGA	13
11. O LE A, E MANATUAI OE?	15
12. UA FAI I LAGI FOLAUGA	14-16

O LE LAUGA

Tusi Faitau: Kenese 22: 1-14

Matua: Kenese 22: 12 *“Soia le o’o lou lima i le tama, aua foi e te fai se mea e tasi ia te ia; auā ua ou iloa nei ua e mata’u i le Atua, ina ua e lē taofia lou atalii, o lou atalii e toatasi, a ua e tu’u mai ia te au.”*

O le tala lenei i le faatonuina o Aperaaamo e tu’uina atu lona atalii o Isaako e osi ai le taulaga i le Atua, o se tasi o tala e tele mataupu tūgā o loo fefinaua’i ai tagata su’esu’e o le Tusi Paia. O ituaiga mataupu o loo fai ai finauga, o mataupu e pei o taulaga e osi i manu ma taulaga e osi i tagata auā o loo atagia mai ituaiga faigataulaga ia e lua i le tala. Le mataupu i se Atua na te faatonuina le fasiotiina o tamaiti, ma se tamā e lē alofa i lona atalii, auā o loo atagia mai foi mataupu ia e lua i le tala. Le mataupu o le faatuatua lē faatuaoia, ma le talitonu i le Atua e aunoa ma se vaai pe lē o afāina ai ola o tagata. O nisi ia o mataupu, ma le tele lava o isi mataupu, o loo fai ai fefinaua’iga a tagata su’esu’e ona o le tala lenei ma ona mataupu feteena’i o loo aliali mai ai. E ui lava i ia fete’enaiga, ae foliga mai o le tala lenei, o se tala o loo tau faamatala ai le fesootaiga vavalalata ma se fesootaiga fefaatuatuaa’i i le va o le Atua ma Aperaaamo, o se tagata ua mausalī ma maua’ā lona faatuatua i lona Atua. E foliga mai foi, o le fesootaiga lenei a le Atua ma Aperaaamo, o se fesootaiga e mafai ona fetofotofoa’i ai le tasi i le isi. E tofotofotofo mai le

Atua, ae tofotofotofo atu foi Aperaaamo. Manatua foi, o loo faamatalaina le mafutaga a le Atua ma Aperaaamo fai mai, o se faigauō. O loo tatala le tala i le faamatalaga a le tusitala, fai mai *“Ona tofotofoto lea o le Atua ia Aperaaamo.”* E ui e lē o ta’ua i le tala le tofotofoina e Aperaaamo o lana uō, o le Atua, ae foliga mai o loo matuā aliali mai i le tala o le faigauō a le Atua ma Aperaaamo, o loo faavae le faigauō i le tofotofoina o gafatia ma le fefaatuatuaa’i o le tasi i le isi. E faatuatuaina e le Atua lana uō o Aperaaamo, ae faatuatuaina foi e Aperaaamo lana uō, o le Atua.

O le upu tofotofotofo, e ese mai le upu faaosooso. O le faaosooso o se taumafaiga ina ia faaleaga, pe faatoilalo, pe faamalaiaina foi se isi tagata. O le galuega lea a le tiapolo na fai ia Iesu, e pei ona fa’aaogāina ai le upu, faaosooso; o lona taumafai lea e faaleaga ma faatoilalo le amiotonu faa-Alo o le Atua o Iesu (Mat.4:1-11). A o le upu tofotofotofo, e pei ona o loo fa’aaogāina i le tala, o le sailia poo le ā le gafatia o malosiaga ma agavaa o loo i se tagata. O le uiga la lea o le tala, o le tala i le tofotofoina o Aperaaamo, ma le tali atu a Aperaaamo i lona tofotofoina e lona Atua. Ou te fia faasoa la i tofotofoga o loo fai i le va o le Atua ma Aperaaamo, ma i’u ai ina fetalai le Atua i le fetalaiga lea ua avea ma matua, *“Soia le oo lou lima i le tama, aua foi e te fai se mea e tasi ia te ia; auā ua ou iloa nei ua e mata’u i le Atua, ina ua e lē taofia lou atalii, o lou atalii e toatasi, a ua e tuu mai ia te au”*

1. **O le tofotofoga muamua, o le tofotofoga i le va o le faatonuga a le Atua ia Aperaaamo, ma le usitaia e Aperaaamo o le Atua.** Ua tofotofoina e le Atua poo le ā le malosi o le usitai a Aperaaamo. O le faatonuga a le Atua ia Aperaaamo ina.... *“Ia e ave lou atalii.”* O le ave o le atalii, ae maise o le atalii e toatasi, e lē o se faatonuga e faigofie ona usita’ia e se tagata. E to’ā fia i tatou e mafai ona e tuuina atu sou atalii ona o se faatonuga a se tagata e fai mai ia te oe? Ae o loo atagia mai i le tala le tali atu a Aperaaamo i le Atua, e tusa ma le faatonuga faatino gatā ua aumai, ma ua matuā faamalieina lava le

faatonuga a le Atua i le usitai a Aperaaamo. Ua gafataulimaina e le usitai i le tofotofoga ua aumai. Ua ausia e le usitai lē faatuā’oia le faatonuga faamalie gatā ua tofotofoga mai..O le tali a Aperaaamo **“O a’u lenei”** i le valaau mai a le Atua ia te ia, o loo faamatalaina e nisi, fai mai o le tali lea a le tagata ua sauni e talia le faatonuga o le a aumai. O le tagata ua atoatoa lona faatuatua i le Atua, ma ua faigatā ai ia te ia ona ia lē usitaia soo se mea e finagalo ai le Atua mo ia. E lua faatinoga o le usitai o loo faamatala mai e le tala. O le usitai o Aperaaamo i lona Atua, ma le usitai a Isaako i lona tamā. O loo atagia i le tala le faatuatuaina e Isaako o le tali a lona tamā i lana fesili, poo fea se mamoe mo le taulaga? O le tali a lona tamā, **“E aumai e le Atua se tama’i mamoe māna e fai a’i le taulaga mu”** O se feau taua foi lea mo i tatou o tagata faatuatua i le Atua. E o faatasi le faatuatua ma le ola usitai e saunia ai o tatou ola e fai le finagalo o le Atua.

2. O lona lua, o le tofotofoga o le osigā taulaga i le atalii, ma le faasaoina o le atalii. O se tofotofoga ogaoga lea ua fai e le Atua ia Aperaaamo...o le osigātaulaga e fai i lona atalii e toatasi. Ailoga e i ai se isi o i tatou e augofie e fai le ituaiga tofotofoga lenei. Ae peitai, o loo atagia i le vaega lea o le tala le ituaiga loloto e mafai ona oo i ai le tofotofoina e le Atua o i tatou o tagata faatuatua. O le ituaiga tofotofoga e moomia ai le tuuina atu e le tagata o mea uma o loo ia te ia mo le Atua. Na gafatia e le faatuatua mata’u o Aperaaamo ona tuuina atu lona atalii e fai ma taulaga. Ua sili atu le mata’u o Aperaaamo i lona Atua nai lo lona naunau faatamā ia faasaoina le ola o lona atalii. O le naunautaiga foi lea o le Atua mo lona nuu o Isaraelu.....ina ia alofa atu i le Alii lou Atua ma lou loto atoa, ma lou agaga atoa ma lou malosia atoa (Teute.6: 5) E i ai le talitonuga, o le ofoina atu e Aperaaamo o lona atalii e fai ma taulaga, o le faata’imuaga lea o le osigataulaga a le Atua na ia foaiina mai ai Lona lava Alo pele e fai ma togiola mo le lalolagi agasala. O le taulaga na ofoina mai e le Atua i Lona alofa tunoa, ae na usitaia foi e Lona lava Alo pele e toatasi le tuuina atu o Ia e fai ma taulaga o le togiola. E i ai taimi e tofotofoina ai o

tatou tagata faatuatua e le Atua. A oo ina sousou ituaso ma lu’itauina lo tatou ola faatuatua, e manaomia lava lo tatou tali atu i se tali e agāi ai le tofotofoina mai o i tatou. Atonu o le oo mai o le faamai o le COVID-19, o le taimi o le tofotofoina lea o i tatou e le Atua; e tofotofoina lou onosai, e tofotofoina lo tatou galulue faatasi ina ia lē manumalo le faama’i, e tofotofoina poo le a le loloto o lo tatou alolofa ma lo tatou agalelei atu; e tofotofoina lo tatou ola fefaasoa’i ma le ola fetufaa’i; e tofotofoina ai lou ola foafoa e toe foafoaina ai nisi faiga fou ona ua taofia faiga sa masani ai; e tofotofoina ai lou ola faatuatua ina ua luitauina lou ola tapua’i. O tofotofoga uma ia, ma le tele o isi lava tofotofoga, ua feagai ma i tatou i lenei vaiata.

O taimi faapenei, o taimi e saili ai le auro i le afi; o taimi e faalolotoina ai lo tatou fetagofi i mea tau faaleAtua e pei ona apoapoa’i Paulo i le Ekalesia i Efeso...ia sulugatiti i le faamaoni, ia ufifatafata i le amiotonu; ia seevae i le talalelei o le filemu; ia talipupuni i le faatuatua; ia puloutau i le faaolataga, ma ia tauave le pelu o le Agaga o le afioga a le Atua (Efeso 6:14-15) Poo a lava tofotofoga e tofotofoina ai le tagata faatuatua, na o auupega lava mai le Atua e mafai ona tatou manumalo ai. O auupega foi ia na manumalo ai Keriso i ona puapuaga, le oti ma le tuugamau.

Fai mai le molimau a Paulo i le Ekalesia i Roma, **“Auā ua ou mauiā, e lē mafaia e le oti, poo le ola, poo agelu, poo alii, poo e malosia, poo mea i nei ona po, poo mea atali, poo le maua, poo le loloto, poo se tasi mea na faia, e lē mafaia e ia mea ona faate’aseina mai i tatou i le alofa o le Atua, o loo ia Keriso Iesu lo tatou Alii.”** (Roma 8:38-39).

Tatalo: Le Atua amiotonu e, ia e faalolotoina lo’u ola faatuatua i ituaso e te tofotofoina mai ai lo’u ola. O auupega faaleagaga mai lau Afio ia e faatumuina ai lo’u ola faalagolago ma lo’u ola faamoemoe ia te oe. Amene.

Saunia: Rev. Nove Vailaau ONZM.
EFKS Porirua, NIU SILA SAUTE.

FAAPAIA MAOTA FOU **PULEGA GAGA'EMAUGA**

O le Aso Faraile 15 Me 2020 na faapaiaina ai le galuega tele o le Maota Fou o le Pulega Gaga'emauga Itu o Tane, i Malua. O le Pulega Gaga'emauga o loo susū ai le susuga Toeaina ia Palemia Tauiliili Reupena FT & Tovale, le afioga Tiakono Toeaina ia Seuamuli Fasi Toma TT ma le faletua, faapea le mamalu i le nofo a Faafeagaiga ma Faletua i Ekalesia e 7 (Patamea, Samalaeulu, Saleaula, Satoalepai/Safai, Fagamalo, Lelepa, Ava). O le tulaga sa i ai le maota tuai, lea ua toe fausia ai le galuega fou lata mai i luma i le auala. Na muamua saunua faamanuia ma alalua le lipine e le Afioga i le Faletua o le Sui Taitaifono Fono Tele, le Faletua ia Teki Iosefa Uilelea, e tatala ai faitoto'a o le Maota, seia ulufale atu le Taitai o le Sauniga, le Laulau o le Fono Tele, le Pulega ma le mamalu o le au valaaulia sa auai. O le afioga i le Alii Pule o le Kolisi Faafaifeau i Malua, susuga Maafala Lima FS, sa ia ta'ita'i le sauniga e viia ma faafetaia ai le Atua - o Ia ua maua ai leni taeao fou o le Pulega. Na faavae upu faalaeiau a le Ta'ita'i i le fale o Maria ma Mareta sa fai ma apitaga masani o Iesu, ma faataatia ai se lu'i ina ia suia le Fale e avea ma Aiga e saili mai i ai manuia o le Atua. Sa ia faafetaia le Toeaina, le afaigaluega ma le Pulega ona o le tofa na a'e lea ua tini pa'o le uto. Sa faapea foi ona faafetaia le afioga i le Matua o Faiva ma le Falefa o le Aiga Salemalama, mo le faatinoga o le galuega matagofie. O le Failautusi o le Pulega, susuga Kirisimasi Fiti FS na saunua i le tala ootoo o le galuega. O le tausaga 2019 na amata fuafua, ma sasao ai tusaga i luga o Aulotu o le Pulega E lua saofaga tai \$5,000 ma le tasi e tai \$3,000 na maua ai le \$91,000, faaopoopo i ai ma isi sailiga tupe sa i le Tusitupe a le Pulega e \$14,201.50 maua ai le aofaiga e \$105,201.50. Na maua nisi fesoasoani e ala mai Asiga e \$20,180, o le Mafutaga Tina Pulega \$20,000, Toomaga EFKS \$50,000. O le tau aofai o le galuega e \$195,401.55. O le afioga i le Matuaofaiva ia Faamoetaulua Ulaitino Tumalii, o se tasi o A'oa'o Fesoasoani a le Pulega mai le EFKS

Lelepa sa nafa ma le galuega. Sa lelei le tausiga o le afaigaluega ma le tapuaiga, aua sa tuu saoloto ma fai ma le loto fiafia e Aulotu taitasi o le Pulega. O le tau o fesoasoani, fela'ua'iga ma auunaga faapitoa e \$21,842.30, a o le oloa na gaosi ai (material) e \$173,559.29. O le fua o le maota e 81' x 60' aofia ai ona potu tofa e 8, ma e talu ai aafiaga o le faama'i Covid-19, e 10 vaiaso na faatino ai le galuega. Na saunua le Afioga Taitaifono Fono Tele, susuga Tunumoso Iosia FT e faaopoopo le agaga faafetai i le susuga Toeaina ma le Pulega ona o leni galuega, faapea foi le soifua fai taulaga fai fai pea mo le EFKS ma le Alii o Iesu le Ao o le Ekalesia. Na ia faatusa le Pulega Gagaemauga i le soifua saili malo o Kalepo ma Iosua i le asiasiga i Kanana; ma o le galuega nei ua tu, o le fuifui vine e molimau i le soifua faatuatua i le Atua soifua. Ona ia tauaaoina atu lea o le meaalofoa a le Ekalesia Aoao e \$5,000 e tusa ai ma le galuega ua maea. Na asiasi maimoa le mamalu sa auai i le matagofie o le maota, ona mapu ane lea mo le taumafataga saunia lelei, ma tualuga ai i fa'aaloaloga mauaululuga faaleaganuu na saunia e le Pulega mo le Taitai Sauniga, Laulau Fono Tele ma le mamalu o le au valaaulia. Malo Faafetai le faaea. Ia faamanuia ma faatutumu atu e le Atua. (Faatonu Sulu)

(silasila itulau 16 mo le Ata o le Maota)

LAUGA ASO SA TINA

Tusi Faitau: Esoto 2: 5 – 9

Matua: Esoto 2: *“Ona alu ifo lea o le afafine o Farao e taele i le vaitafe, o savavali ane foi lona galu teine i le auvai; ua iloa atu e ia le ato o loo i le vao utuutu, ona au atu lea e ia o lana auuna fafine na te aumaia. ⁶Ua ia tatalaina, ua iloa ai le tama, faauta foi, ua tagi le tama; ona alofa lea i ai, ua faapea ane, O so le fanau a sa Eperū leni.”*

Manatu Autu: **O LE ALOFA FAATINĀ**

Soo se vaipanoa o le Tusi Paia e afea ai se tala ua faasino i se tina, o le mea moni o loo afifi mai ai foi

ma tala e uiga i le alofa. Ae tasi lea natura o le Atua e atagia i Lana tausiga i le foafoaga o mea uma e aofia ai ma le tagata. O le Atua e mafanafana ma latalata mai Lona alofa faa-Tina. Tina e, ua anoanoa'i ta'u eseese ua faalupe ai tina Samoa: Fai mai e Au le Ina'ilau a Tina. O tina o le Pae ma le Auli. O le Faufautua ma le Tausimea. O le To'ala Fa'a'utama o aiga ma sosaiete. O le tele o nei faaupuga uma e taofi le failauga, e fuamoa a'ato pe afai e leai le ALOFA. O le ala foi lea ua taualuga ai A'oa'oga Faale-Atamai (*Wisdom Literature*) i le Tāua o Tina. Faataoto 31, *"¹⁰O le avā amio lelei, o ai ea se ua maua? E silisili lona tau i penina. ¹¹Ua faatuatua ia te ia le loto o lana tane; e lē mativa o ia i oloa. ¹²E agalelei o ia ia te ia, a e lē agaleaga i aso uma o lona olaga."* Lea ua manino i a'oa'oga a Solomona, e ala ona taugata le tina e sili i lo penina ona ua faatuatua ia te ia le loto o lana tane. E pipii i ai le loto o lona toalu. E tafe mai le alofa i lona olaga o aso uma. A o le faailoga foi o le tina ua mafuta ma le Atua i lona ola mata'u. E tautala i le gagana a le tina ua faatuatua. Ua fa'a-auupegaina e le Atua lona tiute faa-faufautua. O le la'o'ai e tumu taumasuasua e to'a i ai le matelaina ma le galala faaleagaga o le aiga ma fanau. Afai e silasila ane i le amataga o le Mataupu lava lenei e 31 o le Tusi o Faataoto, o lena o loo talanoa mai i apoapoiga a se tina alofa i sona atalii. E ui e le o mailoa po o ai Lemuelu, po o se tupu foi o fea se nuu, ae ese le manaia o lea tuualalo faa-tina. Faafofoga foi, *"²Se a ea sau upu ia te oe lau tama e? se a lava sau upu ia te oe na fanau i lou manava? Se a lava sau upu ia te oe le tama na out auto ai? ³Aua nei e avatu lou malosi i fafine, ma ou ala i le mea e fano ai tupu. ⁴Lemuelu e, e lē ono i tupu, e lē ono lava i tupu le inu uaina, po o alii e manao i le ava."* O le uiga lea o le tina alofa le nuu e o le Atua. E natia lona alofa i le pele o fanau, ae fana i le tuitui sana upu auā le lumanai ina ia lē tō i vasa le faamoemoe o matua, aiga, nuu ma ekalesia. O le ata foi lea o loo atagia i le Tusi sa faitauina mai le Feagaiga Tuai. E ui ina faauliulitō le ita o Farao ma Aikupito i le sailiga o tama tane Eperu e fananau mai

ina ia fasioti, a e lei mafai e lena pule faale-tagata ma tapu faale-malo ona faatoilaloina le Alofa Faa-tina o le Atua i Lana Isaraelu. Le alofa na mamamu mai ai le olaga o Iokapeta ma le tamaitai o Miriama. O a togafiti uma sa fausia e faasao ai le ola o Mose; e tasi le faauigaga, o galuega faa-tina alofa uma na! E le popole pe tua i le oti, ae ia laveaiina le tamaitiiti. O le alofa e taula ana tapenaga uma mo le ola o fanau. O le tala lauiloa e pei ona iu ane ua avea le tama Eperu o Mose, ma tagata iloga o le maota o le tupu Aikupito. A o le mea mautinoa lea, o le alofa faa-tina, ua faamatala mai ai le alofa silisili o le Atua. Le alofa na sapaapaia ai le ola o Lona nuu valaauina o Isaraelu, ina ua faasaolotoina mai le pologa.

Le mamalu e o tina o le Ekalesia, e talitonu le failauga e lē toe tau faa-fuluina lo outou soifua faatuatua i le Atua. O upu foi ua masani ai, 'O tua atu o se tamā faaeaina, o loo tu mai ai se tina e aupito sili ona lelei.' A o le muagagana Eperu e fai i tina fai mai, *'E le o teuga, a o le faapuna...'* O le a lona uiga? E matagofie i ta'ua ona ua laei i le alofa. Ua iloa lo ta taugatā e sili atu i penina ona o le alofa. Le alofa e lē manatu faapito i le saofaiga a fanau, ae tutusa ai tagata uma. Le alofa e mafua ai ona fesoasoani ma agalelei atu. Le alofa e lē pa ai le a'oa'i, ae fiafia etautalatala i le Tusi Paia, faapei ona a'oa'o e Loi ma Eunike lo la atalii ia Timoteo i mataupu faaleagaga. O le Alofa Faa-tina e afuafua mai le alofa mutimutivale o le Atua. O le mafua'aga na silisili ai galuega o le faatuatua na faia e tina o le Tusi Paia. Na lē tuua ai e Ruta le tina matua ia Naomi, seia tete'a le la mafutaga e ala i le oti. Le alofa moni na tata'e ai le fagu alapasa manogi e le fafine, ma soloi ai aao o le Alii o Iesu. Le alofa na taumulimuli ai Maria i lana tama peleina o Iesu, seia taunuu i le satauro ma le oti, faapei ona aumaia ai le faaolataga mo le lalolagi uma. O le faailoga lena o le ALOFA TUNOA silisili o le ATUA, ua ta maua ai le ola ma le ola atali e faavavau. IA MANUIA TELE LE ASO SA O TINA I LENEI TAUSAGA 2020! Amene.

Saunia e Viola Kirisimasi Sani, EFKS Ululoloa ma Siusega, FALEATA.

NA O AFIGA E TULEI MAI FOFOGA...

‘AUA LE FAAVAIVAI

Neemia 4: “¹⁰Ua itiiti le malosi o e ave avega, ma ua tele le otaota; tatou te lē lavā ai ona ati le pa”

O le tala ia Neemia ma le galuega o le toe fausia o pa o Ierusalem, o loo taua mai ai nisi mafuaaga o le *faavaivaia* o i tatou a o feagai ma galuega ua tofia ma valaauina ai, e pei o nisi nei:

(1) **O le lē lavā (fatigue).** Fai mai tagata o Iuta, ua itiiti le malosi e amo ai avega. O lona uiga ua saga galulue pea ua i’u ai ina itiiti ma tauau ina leai se malosi i le tino ma le mafaufau, aafia atu ai ma le loto. O nisi taimi e faasesēina i tatou i le manatu o le ‘faavaivai’ ua na o se mataupu faaleagaga. E faapea ifo, ‘Mata e manaomia le toe faasaga o lo’u ola faaleagaga i le Atua’, meaane o le faafitauli moni ua uma le malosi faaletino fuafuaina e tatau mo le tagata i lea taimi. Ua manaomia se malologa, e ala mai ai se faafouina. O nisi taimi o le gaoiga faaleagaga e sili ona talafeagai o le malolo, fai sina koma, sina moe. Manatua e le’i fausia Roma i se aso se tasi, ma e le’i faia fua le po e malolo ai. O le a le taimi e oso mai ai le vaivai? Ina ua ausia le vaeluagalemu o se galuega. “⁶Ua matou atia le pa...e oo i lona vaeluagalemu..auā sa loto lava le nuu i le galuega.” E amata ma le filigā i le osoosoga o le malosi ona o le fiafia i le manaia o le poloketi fou. Peitai a o faagasolo le faatinoga, e faapea foi ona fai ifo le fiafia ma le naunau; e oo ina ‘iva ma fai tau ina faataunuu, tulai mai le vaivai, ma tu’u faalēmae’ a ai. E ao ina faaeteete, auā a ulufale mai le vaivai, e ulufalo le faatuatua! O le ala tonu lea na faapea ane ai le fai-Salamo 23: ²Na te ave a’u i le mea e i ai le vao mu’a ou te taoto ai; ³na te faafoisia mai lo’u agaga. A fai e manaomia se malologa, e fautuaina le fai loa.

(2) **O le lē mautonu (frustration).** “¹⁰ua tele le otaota; tatou te lē lavā ai ona ati le pa.” Sa feagai sã Iuta ma le fausia o le pa e fou, ae o loo paepae

otaota o le pa tuai. Ma ina ua latou vaaia nei otaota ona latou faavaivai ai lea ma lē faasaga tonu i le galuega. Ua tele le otaota i totonu o le olaga ua lē mautonu ai pe faapefea ona fausia le soifuaga moni. Soo se galuega fou e fia fai, e i ai otaota tuai e ao ona aveese muamua auā e fai ma faalavelave. O mea e lē maalofia, ae mafai ona a’oa’oina i tatou i le mea e fai i ai ina ia ‘aua le lafoa’iina le faamoemoe autū. O le a se otaota poo ni faaputuga otaota i lenei vaega o lou soifuaga? Mea faatauvaa e alu ai ou taimi tāua, pei o le telefoni ma fesootaiga faa-upega tafailagi, nofonofo i masini ma taaloga suetupe, mea e alu ai lou malosi ma taofia oe mai le faatinoina o tiute e ausia ai lou tulaga sili ona maua? Soo se otaota e faalavelave i ou faiva tofi ma tiute tuuina mai e le Atua, e fai i totonu o lou aiga, lau galuega ma lau Ekalesia, ia e mataala e vave lafoa’i ae le’i ave ma auro ma penina e te faamuamua, ae latou te lei pulea foi le faatautaiga o lou olaga. E leai se isi e faia, e lē faia e le Atua, e lē faia e au tatalo, ae na o oe lava. Na tuu e le Atua Atamu ma Eva i le Togalaau i Etena ma poloai ina ia tausi ma leoleo. O le tausiga ma le leoleoina o faamanuiaga ua aumai e le Atua mo i tatou, tatou te iloa ai le eseese o mea anoa o le olaga mai otaota; ma o se aoaoga e faia pea seia maea le pā ma tu le failā.

(3) **O le toilalo/faiaina (failure)** – pei ona atagia i le faaseā a Iuta, ¹⁰tatou te lē lavā ona ati le pa.” O nisi e toilalo lava e lei amata, e lei taumafai, a o nisi e fai lava ma le toilalo. Mo Iuta e ui ina e lei o gatasi le futia ma le umele, ae sa faamalolosi pea. O le eseese o tagata faiaina ma tagata manumalo - o ē manumalo e vaai i le toilalo o se mea lē tumau, ua na o se auala e saga tauivi atili ai ma e vaavaai i luma atu o le taimi nei. *Faata.24: “¹⁶E atu fitu ona pa’ū lē amiotonu, a e toe tu o ia..”* E pei o le finauga i le va o le vaitafe ma le papa - e manumalo le vaitafe, e lē ona o sona malosi ae ona o le onosai e tutumau (perseverance). Fai mai foi se tasi tusitala, ‘O le mea lilo o loo i le faaeaina, o le amata mai valusaga ma valuvalu ai pea! (The secret to success

NA O AFIGA E TULEI.

is to start from scratch— and keep on scratching!). O lea afai e faavaivaia lou taumafai ua folafola mai afiga a le Atua, Eperu 10: ³⁵*O le mea lea 'aua le lafoa' i ai lo outou loto tele, auā ua i ai le tau i e tele.* ³⁶*Auā ua aogā ia te outou le onosai, ina ia maua e outou le mea na folafolaina.*”

(4) O le fefe (fear). ¹¹*Ua faapea ane foi matou fili, 'Latou te le iloa, latou te le vaai, seia matou oo atu i totonu ia te i latou, ma fafasi ia te i latou, ma faagataina le galuega.*” Aiseā na lē mananao ai fili o Isaraelu e toe fausia pa o Ieruselema? Auā o le pa e puipuia ai le saogalemu ma le tamaoiga o loo i totonu. Na ala ai ona faasaga le fili e muamua faatauemu sosoo ai ma le faafefe. Ae silasila i tagata na muamua faavaivai, o nisi lava o sa Iutā: ¹²*Ua o mai foi sa Iutā o e na nonofo felatai ma i latou, ona latou fai faasefulu mai lea ia te i matou, 'O mea uma lava tou te foi mai ai ia te i matou, latou te feosofi mai ai ia te outou.*” O le umi o lou latalata i tagata palaaai e te soo ai i lo latou fefevale. Ia filifili paaga ma aumea e faamalosiua ma faa-tupu ola ia te oe. Ae sili ai ona tu i luga o afiga a le Atua, Teute. ³¹¹⁸*O le Alii foi, o ia na te savali i ou luma; lua te faatasi ma ia, na te lē tuuna oe, na te lē lafoai ia te oe; 'aua e te fefe, 'aua foi e te mata'u.*”

MANATU AUTU FONOTELE 2020 **“LUGA O LE ALA, SAVAVALI MA IESU”**

Tusi Faitau: Luka 9:57-62

Matua: Luka 9, ⁵⁷*Ua latou o i le ala, ona fai mai lea o le tasi ia te ia, ou te mulimuli atu ia te oe i mea uma e te maliu atu i ai.*”

Sa i ai le au savavali masani a Iesu— o soo e 12 ma nai tina, na latou savalia ala o Kalilaia, Iutaia ma Samaria. Sa i ai foi le motu na fia savavali mulimuli atu; na folafola i ai le Malo o le Atua, fafaga, tutuli ese temoni, faamalolo i ma'i eseese, faaola mai le oti. O le toatele o le motu e mai le vasega aupito faatauavaa ma maulalo o Iutaia, ma e le'i talitua limaina

e Iesu se tasi o i latou nei. *Mata. 11: ²⁸Ia outou o mai ia te a'u...e malolo ai outou.*” Sa i ai tagata na valaauina i luga o ala faapitoa. O le ala i Emāu, na savavali ai Iesu ma Kaleopa ma lana paaga i le 7 maila ae le'i iloa Iesu. Seanoa le tofitofiga o le areto, na faatoā pupula ai mata (Luka 24:31). O le ala i Ieriko, na toe pupula ai Patimaio (Mare. 10:46). Na fetāia'i ai foi Iesu ma Sakaio le ao lafoga sili e saasaa ae mau'oa. E le'i mafai ona iloa atu Iesu, ona muamua lea i luma ua a'e i le sukamoru e vaavaai ifo ai. Na valaau Iesu, Sakaio vave ifo i lalo. Na savavali i lona fale talisua ai. Ua salamō, vaeluaina atu ana mea i e matitiva, ma tau'i atu ta'ifā o mea na ia faoa mai i auā pi'opi'o. Luka 19: ⁹*Ua oo mai le faaolataga i le aiga nei i le asō, ina ua fai o ia ma atalii o Aperaamo.* ¹⁰*Auā ua sau le Atalii o le Tagata e saili ma faaola i lē na lē iloa.*” O le ala i Tamaseko, na taia ai Saulo. Na ia fesili, O le a se mea e te finagalo ou te faia? Na faatonu e Iesu ia Anania ina ia alu i le ala e igoa o Sa'o, e faapupula Saulo le ipu filifilia mo le Tala Lelei.

E lē o māua le igoa tonu o le ala i le Tusi Faitau. Pau le mea mautinoa o loo ta'ua e Luka, ⁵¹*Ua oo atu i ona po e siitia ai o Ia, ona matuā faasaga atu lea o ia e malaga atu i Ieruselema.*” Lona uiga o se savaliga e tāua tele ia Iesu, a o tapena atu mo le laumua, le nofoaga e tauluga ai lana savaliga. Pe ta'u foi o le Ala Fefiloi. Auā e lē tasi se ituaiga tagata sa fia savali mulimuli ia Iesu, a o i luga o leni ala. O isi na faaosofia i le toatele o le fuainumera o le vaega a Iesu. E lelei le toatele e faigofie ma māmā ai galuega fai. Auā a toaititi e maua toatasi ai, pe vave foi ona toe oo mai le faasologa o mea fai. O isi e mulimuli faa-polokiki - fa'aaoga Iesu ma le Tala Lelei e faalauiloa atu ai lona tagata. O isi e faa-pisinisi, ia alumia ma vave taulia ai ana atina'e. O isi na tosina i tala faalogo, o le fia iloa na vave sau ai, ae vave foi le toe mou atu. O fatu na pa'ū i le mea papa i le faataoto. E ititi le eleele faaleagaga e maua ai; e vave ona totogo a'e, ae vave foi ona toe velasia i le la ma magumagu; e alu masalosalo poo fea e tua i ai le savaliga. E faapea foi isi na pa'ū i le vao tuitui, e fia

MANATU AUTU FONOTELE 2020 - SAVAVALI MA IESU

mulimuli ae ua taafifili faatasi ma popolega i le 'oa, manumanu ne'i to'esea ma faaitiitia. O isi o loo ta'utino e Iesu i lana tali, *"⁵⁸E fai lua o alope, e fai foi mea e momoe ai manu felelei."* O tagata fai togafiti e pei o le alope. E o mai e tofotofo, su'esu'e, faamasino, faatusatusa, mailei Iesu ma ona soo, ae lē o le fia faaolaina. O isi e pei o manu felelei; e fiafia e felelea'i solo, e lē tumau i se mea e tasi. E lele atu i lea laau, toe apatā mai i lea laau. 'Ai atu fuga o lea fugalaa, mimiti atu le suamalie o lea, ma faasalalau solo fatu laau, fela'ua'i tala e faatupu ai misa ma fevaevaeaiga. E mulimuli atu i lea lotu, savavali atu ma lea rapi, ua lē iloga se tapuaiga e mau ai. Ma isi ituaiga. E le'i po malaē, na silafia ma tali Iesu, *"⁵⁸a o le Atalii o le Tagata, e leai se mea e moe ai o ia."* O le lapataiga ina ia toe mafaufau faalua, toe silasila toto'a, iloilo ma tapena mamao ae le'i mulimuli atu, auā e lē faigofie, e le olegia foi Iesu. E lē faavaitaimi pe faa-pasi taimi, e lē faasamasamanoa. E leai se saolotoga e pei o manu, ae ua ola i noataga faa-auauna mo le olaga atoa. *Luka 9: "²³A fia mulimuli mai se tasi ia te au, ia faafiti o ia ia te ia, ma ave lona satauro i aso fai soo, i le mulimuli mai ai ia te a'u."* O le Soo ua osi feagaiga ma lona Matai, pei o le tautoga a le faato'a nofotane ma le faato'a faiaivā i le solo lelei poo le mativa, i le ma'i poo le maloloina, ia nofo sauni e fetaia'i ma puapuaga, e oo lava i le faatautau i lona satauro, se'ia oo ina tatala i le oti le feagaiga faavae i le alofa.

O nisi na valaaulia faapitoa e le Alii, *"⁵⁹Ua fetalai atu o Ia i le tasi, 'Ina mulimuli mai ia ia te a'u."* Amuia i latou nei sa i ai le malosi talafeagai, sa i ai meatotino, measina ma aseta; sa i ai taleni ma agavaa faapitoa, sa i ai faailoga ma tusi pasi maualuluga o le a'oa'oina lelei, sa i ai le pototo masani ma le pototo salalau, ma isi tomā faapitoa fia fa'aaogā e Iesu mo lana galuega. Ae paga lea! Ua maumau le avanoa faa-auro lē āu maua, ua melea avanoa lelei. E fia mafuta pea ma tausi seia oo ina maliliu ma tanu matua pele. Ua a'oa'o Iesu ina ia tuu pea i e ua oti le tino, o i ai tagata o le lalolagi e nafa ma tuugamau, a o e mulimuli atu ua lē ni o le lalolagi, ua vavae ese mo le

galuega ua faapaiaina. O isi sa fia mulimuli ae faanoi i tuatuaiga, fia faamavae i avā ma fanau. O loo silafia lelei e Iesu ia tulaga, i sootaga faale-tagata. Peitai o lona finagalo, ia ave le faamuamua, tuu le faamamafa i mea e maua ai le ola faavavau. Ia faatulaga muamua Iesu, ae tulaga lua isi tagata ma mea uma. *Mata. 10: "³⁷O lē ua tele lona alofa i lona tamā poo lona tina, a e itiiti ia te a'u, e lē aogā lea ia te a'u."*

E fautuaina malosi le 'aia ne'i tago i le suotosina ma tepa i tua. O le galuega fai-faatoaga, e lē tago faatemutemu i le suotosina, ae tataua ona mau lelei, ina ia goto le suō i le eleele e suatia i luga fai ma eleele lelei. E tepa taula'i i luma ina ia sa'o lelei ma sagatonu laina e totō ai laau. A tepa i tua e sipasipa solo laina, e matagā i le vaai ma e lē ola lelei ai le faato'aga. Ae sili ona faaletonu pe a mamulu le suotosina, ona pa'ū lea i ai e manu'a tigaina pe maliu ai lava. O le i'uga o le tagata e tepa i tua pei o le fafine i Sotoma na liu tupua masima. E mulimuli le tino ae o le lototo e tu'i ma nanau i le olaga tuai, fiafia e fai pea le agasala, e le'i salamō faamaoni, e le'i fanaufouina. Peitai le tagata ua savali i tulaga 'a'ao o Iesu, e savali sa'o i le ala tanu ua taatia mai luma, ma taula'i le vaai ia Iesu o muamua. O le so'o eleele lelei ua uma na suotosina faaleagaga, sauni e sua ma suo nisi agaga e lūlū i ai le fatu mo le seleselega.

Le Ekalesia pele a Iesu Keriso, ua tatou savalia ala faigatā, o faama'i oti ua lamatia ai lo tatou ola. Ua lamatia le ave ma soo moni i le fefe, popole ma atuatuvaale. Savavali ma Iesu na fetalai, *Ioa. 14: "¹Aua le atuatuvaale o outou lototo; ia outou faatuatua i le Atua, ia faatuatua mai foi ia te a'u."* Ua afaina tapuaiga ma galuega masani faale-EFKS. O taimi e faigofie ona fai ai faanoi, e faigofie ona toe fo'i ai i tua i le olaga agasala, gasegase faaleagaga o le faavaivai ma solomuli. Ua faaosoosoina ina ia fai sina mapu ane teisi, se'i toe sologa lelei pe a uma le Covid-19. Ua afaina le tamaoiga, gaogao mea e tua i ai i aso taitasi, ua faigata le tausiga o aiga. E faamuamua ai lou lava lelei, sosoo ai i latou e pele, a i ai se mea e totoe ua

lava lea mo Iesu. Pe a tele foi le oge, ona saili lea i ala faa-solitulafono ma amiolētonu e maua ai mea e tatau mo le aso. A o le tasi upu tāua i aso faapenei, *E iloa le auro moni ina ua tofotofoina i le afi.* O taimi faigatā e iloa ai soo moni o Keriso, ina ua pupula mai le faatuatua, loto tele, faamaoni ma le amiotonu. Pe a lutia i puapuaga, e tumau ma mausalī le pipii ia Iesu; o aso sousou e tula'i mai ai le tautai mata-palapala, e mau pea le to'ovae, e si'isi'i le tai ae malū pea lana faatofalaiga. E faavae i le alofa le faafoeina o le sa ma upufai o aiga, faiga- malo, ma lana Ekalesia. E tu i matagi'olo, e fai ma tali pupuni, e puipui le saogalemu o lona Matai, o lana tapuaiga ma ona upu fai, o lona Faavae ma ana Iugafono Tumau, a e a le va feagai ma pulega faamalo ma faiga faapolokiki.

O le faamanatu a le Tala Lelei le EFKS pele e, ia tapasā pea lau folauga e le Atua, o le Ao ma le Afi faaniutū ta'ita'i malaga, i la tatou savaliga o nei aso faigata ma aso uma. O Iesu o Ia le Ala e tasi, ua na faasino mai le ituaiga savali tatou te mulimuli ai. E le'i faasapasapa pe tauto'ai, o le a le tele o faigata na latou fetai'a'i. Na savali totolo i ona tulivae ma amo toatasi le satauro mamafa o a tatou agasala. A o lona toetu manumalo, ua faaeaina faatasi ai ma le soo e mulimuli faamaoni seia oo i le iuga. Ia manuia lau savaliga le EFKS, ma ia i le Atua le viiga e faavavau. *F.Sulu.*

IA FAAFETAIA LE ATUA ONA O LE TOTO O LONA ALO

“¹⁸E le'i togiolaina outou i mea e pala...¹⁹a o le toto tāua o Keriso...: 1 Peteru 1.

O le tala i le Togiolaina e amata mai Etena ina ua faamaligi e le Atua le Toto o le tamai mamoe, *“²¹Ua faia foi ofu pa'u e le Alii le Atua mo Atamu ma lana avā, ua faaofu ai ia te i laua.”* *Kene.3,* ae faaiu i le Lagi i pesega a le au paia, *“⁹ua e faatauina*

foi tagata i lou lava toto mo le Atua mai ituaiga uma, ma gagana eseese, ma nuu, atoa ma atunuu.” *Fa'aa.5.* O le Toto o Iesu Keriso e fai ma faailoga o itu nei e 2: (i) *O le tau o a tatou agasala.* Na tuu atu i luga o tau'au o Keriso le mamafatū o a tatou agasala uma, mai le taimi na tatou fananau mai ai seia oo ina tatou toe feoti atu. Ma o se tulaga lelei foi e ao ona manatua, i soo se taimi e faaosoosoina ai i tatou e lafoa'i Afioga a le Atua ma lona finagalo ae fai o tatou loto. (ii) *O le fofō o a tatou agasala.* O lo tatou faaolataga e le'i faia i se tatou faiga faa-paaga ma le Atua. Leai. E le'i i ai ma sina tatou sene na alu i le toe faatauina mai o tatou mai le pologa, auā sa tatou matuā matitiva masaesae faaleagaga. *“¹⁸Auā ua outou iloa e le'i togiolaina outou (toe faatauina mai le pologa ma toe faasaoloto) i mea e pala, o le ario poo le auro...¹⁹a o le toto tāua o Keriso pei o lo le Tamai Mamoe e lē ponā lava, e leai foi sona ila.”* *1 Pete.1.*

O le tala'iga o le Toto e faa-va'atuaia ia i latou e i ai agasala o loo natia, i latou e i ai mitamitaga e puipuaia, poo e folafola se tala lelei e ofoina atu le faaolataga e ala i galuega lelei ma auaunaga aogā. O le Toto o Iesu e lē gata e lavea'iina le tagata agasala e salamō, ae ta'usalaia ai foi le tagata na te teena auā, *“²²a lē o i ai foi se faamaligiina o le toto, ua leai foi se faamagaloina.”* *Epe.9.* E le'i mafaia e mala ma uato'a ona faasa'oloto le nuu o le Atua mai le lima malosi o Farao. A o le ā? O le Toto. Na o le Toto lava o le tamai mamoe na fasia! *“¹³E fai foi le toto ma faailoga ia te outou i fale tou te i ai, ou te vaai atu foi i le toto, ona ou sosopo ai lea ia te outou.”* *Eso.12.* Ma e oo mai nei lava seia faavavau, e lē faaitiitia le mana e lē uma le paoa o le Toto i soo se vaega o lo tatou ola: (a) faamālolō i tiga o le tuana'i, (e) faamamā ma faasaoloto mai agasala inosia e lē fia talatalaina, (i) faamalumu ifo e puipuaia mai mala, (o) tosi le laina e taofi ai le fili e sā ona sopoia mai. Faatasi ma isi faamanuiaga matalasi o le alofa tunoa, e tatau ai ona saga faafetaia pea le Atua ona o le Toto o Lona Alo pele e toatasi. *F.Sulu.*

FAAMAVEGA FAIFEAU PENISIONE FAASALELEAGA

O le Aso Sa 17 Me 2020 na fai ai le sauniga faapitoa i le EFKS Vailoa Palauli, e Faafetaia, Faamavae ma Faamanuia atu ai le Matagaluega Faasaleleaga i le Faifeau Tausinuu susuga Siaosi Leleimalefaga FS ma le faletua ia Perelini - sa fuafua e malolo penisione i le Fono Tele tausaga nei 2020. O le susuga i le Toeaina ia Leaso Tupa'i (KMTA) sa taitai le sauniga, na auai uma ai Tama o le Matagaluega - Ioane Viliamu Samoa FT (Safotulafai), Faasavala Leilua FT (Salega), Fiafia Toleafoa FT (Amoa), & Afioga Tiakono Toeaina. Sa auai foi le Failautusi tofia o le Matagaluega, susuga Epati Amosa FS (Sili) ua sui tulaga i le susuga Simalu Kovati FS (Taga). Sa tauaaoina atu ai i lea sauniga le meaalofoa a le Matagaluega Faasaleleaga e \$40,000, faatasi ma faamanuiaga ma moomooga alofa mo le susuga Faifeau Penisione & Faletua.

A o le Aso Sa 24 Me 2020 sa faapea foi ona faia ai le isi sauniga faapitoa e faamavae atu ai le Pulega Palauli tainane le EFKS Vailoa, i le Susuga Siaosi ma le Faletua. O le susuga Toeaina o le Pulega Leaso Tupai FT na taitai ma saunia le Lauga, susuga Mose Tanielu FS na faia Talosaga, susuga Uili Konelio FS na faitauina le Tusi Paia, a o le Failautusi Pulega Susuga Niulala Kupa FS na saunoa e molioo le Faamalo Faafetai ma Moomooga Alofa o le Pulega, ma tauaao atu meaalofoa Pulega e \$30,000 ma le Mafutaga Tina Pulega e \$20,000 faatasi ma le anoanoa'i o laei ma oloa matagofie. Na saunoa foi le afioga ia Autagavaia Uiese Mataafa TK e fai ma sui o le Aulotu i le agaga lava lea e tasi, ma folasia ai le Toga e tatala ai la latou Feagaiga. Na saunoa le susuga Siaosi i a la'ua upu taumavae, faavae i fetalaiga a Iesu, *Ioane 21: "18Ua e fusi oe ina o e taulealea..a e pe a e toeaina, e te faaloaloa ou lima, e fusifusi foi ia te oe e se tasi, e ave foi oe i le mea e te lē loto i ai. 19Ia e mulimuli mai ia te a'u."* O lea lava sauniga na tau'a'ao atu ai Pine Tualoa o le Penisione, na saunia e le Matagaluega Faasaleleaga. Talaaga o le soifua tautua i le EFKS: 1973 - 1976: Ulufale Kolisi Faafaifeau Malua 1976 - Na Ulu i ai le Vasega Tausaga 4 (Dux Prize) 1976: Faaiipoipo e Malele Pitoitua FT @ Faatoia 1977 - 1992: EFKS Utualii (15 tausaga tausinuu) 1980-1982: Komiti Tupe 1981: Usufono PCC i Toga

OSIGA FEAGAIGA EFKS FAGAFAU

O le Aso Sa 10 Me 2020 na faataunuu ai le sauniga o le Osiga Feagaiga a le EFKS Fagafau, Pulega Salega i le Matagaluega Faasaleleaga, ma lo latou Faifeau le susuga ia Epati Sooula FS ma le Faletua ia Vicky. O le faatofalaiga lea a susuga Toeaina ma le Pulega, ina ia o gatasi ma fuafuaga a le Malo, i Puipuiga o Faalavelave Tutupu Faafuase'i (State of Emergency) talu le Faama'i Covid-19 i lenei tausaga. Na ta'ita'i le sauniga e le Toeaina o le Pulega susuga Faasavala Leilua FT (Faiaai), faitau Tusi Paia le susuga Ionatana Tupolo FS (Vaipu'a), tatalo le susuga Aokuso Taumate FS (Samata-tai), a o le lauga na saunia e le susuga Mose Malaga FS (Sala'ilua). Sa auai nisi o le afaigaluega Faifeau ma Faletua, o A'oa'o Fesoasoani ma Tiakono o le Pulega a Salega e molimauina lea faamoemoe taua.

O le Aso Faraile 8 Me 2020 na muamua feiloai ai le susuga i le Faifeau ma le Faletua ma la'ua aiga, ma le Aulotu/afioaga o Fagafau - auā le afio o Alo o Lilomaiava, susū Sa'u ma le afioga Tuimaugapō ma lo latou aiga, le mamalu ia Soā ma le Falefa o Saomai. O le susuga Epati Sooula o le lupe faalele mai le afioaga o Fatausi, a o le faletua ia Vicky o se alo faasino i le EFKS Foua Salelologa; o le EFKS Sandringham na lolotu, faaiipoipo ma su'e mai ai i Malua. Ia faamanuia tele le Atua i le galuega a alo atu i ai. (*Saunia Pulemau Seve FS, Failautusi Pulega*).

1985-1987: Komiti Feau Eseese

1990 - Usufono FGFL i Niu Sila

1990 - 1992: Komiti Atina'e

1991 - Taitaifono Komiti Atinae

1992 - 1998: Pule Aoga, Kolisi Leulumoega Fou

1998 - 2020: EFKS Vailoa, Palauli (22 tausaga)

Ua 44 tausaga o le soifua auauina i le EFKS.

E ese mai ai i le taitaiina o loto ma agaga ia Iesu Keriso ina ia faaolaina, ae ua mafai ona faaitiitia le pule a Alii ma Faipule i upufai ma galuega a le Ekalesia, ma le soifua fai taulaga na ausia le \$200,000 Taulaga Samoa i le tausaga. O Siaosi na soifua mai i le aso 8 Setema 1950, o le Taulaga Soifua mai le EFKS Salesatele Falealili, a o Perelini na soifua mai i le aso 23 Aokuso 1957, e mai le EFKS Matautu-tai Apia. Ua mapu atu nei i lo la'ua aiga i Vaivase-uta. Ia faamanuia atu le Atua. Tautai a'e!

O AU AFIGA LE SULU I VAE & MALAMALAMA I ALA

FETAUIGA MA LE TEVOLO

(1) *2 Kori.2:* ¹¹*Ina nei 'ole'olegia i tatou e Satani; auā tatou te lē vālea i ana togafiti.*”

O loo fiafia le tevolo i le tulaga lea e i ai le talitonuga taatele ia te ia faapea e leai se tiapolo. O le faateteleina o lenei mafauauga sesē i le leai o se tiapolo, o le tele foi lea o lona saolotoga e tafili saunoa ai e faaleaga i tatou. E le'i i ai sina masalosalo o Iesu i le moni o le i ai o le tiapolo. Fai mai Mataio 4, *“¹Ona aveina a'e lea o Iesu i le vao e le Agaga, ina ia faaosoosoina e le tiapolo.”* Peitai na manumalo ai Iesu. Ma ua Ia faamaonia ai e fa'aaogā e le Atua fetauiga ma Satani ina ia faatamaoiga ma faamalosi atili ai lo tatou faatuatua.

O fetauiga ma le tevolo o taimi tonu ia o koleniga faaleagaga, o a'oa'oga ma faamalosiagaga. Fai mai Iakopo 1: *“²O'u uso e, ia outou manatu, o le mea e fiafia tele ai pe a maua outou i tofotofoga eseese; ³ina ua outou iloa o le tofotofoina o lo outou faatuatua e tupu ai le onosai. ⁴Ia atoatoa foi le galuega a le onosai, ina ia atoatoa ai ma ia sao ona lelei ai outou, ia leai se mea e mativa ai.”* O le alofa tele o le Atua ia i tatou na te lē tuuna ai tatou ia vaivai pea, e lē tutupu ma lē matutua faaleagaga. *Eperu 12:* *“⁷Talia e outou le aoaiga, o loo tausī mai le Atua ia te outou e pei o atalii...⁸A e afai e aunoa outou ma le a'oa'iga, o tama to i fale outou, a e le ni atalii. ⁹Auā foi sa ia i tatou tamā o tatou tino e na aoai mai i tatou, sa tatou faalogo ai; a e lē sili ea i se a ona tatou usiusitai i le Tamā o tatou agaga tatou te ola ai? ¹⁰ua aoai mai o Ia e aogā ia i tatou, ina ia tofusua i tatou i lana amio lelei.”* O la Paulo, *“¹¹Tatou te lē vālea i ana togafiti.”* I le ata tifaga o le 'Patton' o loo osofa'i ai e le taitai'au Amerika o Patton le itutaua a le alii Siamani o Rommel i le Taua Lona 2 a le lalolagi. I le vevela o le taua na valaau atu ai Patton, 'Rommel, na ou faitauina lau tusi!' Ua uma ona faitau ma su'esu'e e le Amerika le tusi a le alii Siamani

(Rommel's Infatry Attacks) o loo faamau uma ai ana metotia, fuafuaga ma gaiouga - ma fai fuafua loa i ai ma tapenaga a Patton. E faapena le taua ma le tiapolo; afai tatou te masani ma ana auala ma metotia, e faigofie foi ona tatou taofi tutū ia te ia pe a valaau atu, 'Satani, ua uma ona ou faitauina lou mafauafau taufaavalea.'

(2) *1 Peteru 5:* *“⁸Ia outou faautauta, ia outou mataala, ona o lē ua fai outou mona fili, o le tiapolo lea.”*

Ina ua fai fetauiga a Iesu ma le tiapolo i le vao, e le'i i ai ma sina tu'i poo se so'a a Satani na pa'i atu ia Iesu. E faatolu ona fetalai Iesu, *Mataio 4:* *“^{4,7,10}O loo tusia..”* O ana tu'i malolosi ia e tolu na patatū ai Satani i lalo ma pasasa lona tua lē toe mafai ona tula' i le uma ona faitau upu. E faapefea ona lavea Satani? Se'i tatou toe vaavaai i taamilosaga taitasi:

Taamilosaga Muamua. *“³Afai o oe o le Alo o le Atua, ina fetalai atu ia, ia liu areto nei maa.”* E valalua le osofaiga a Satani o loo fai i iinei: (i) *“Afai o oe o le Alo o le Atua”.* E taumafai Satani ina ia tatou fesiligia ma masalomia lo tatou faaolataga, lo tatou Faaola, ma lo tatou ta'uamionuina i luma o le Atua. (*2 Kori.5:* *“²¹Auā o lē na lē iloa le agasala, na faia o Ia e le Atua ma agasala mo i tatou; ina ia aveia i tatou ma amiotonu a le Atua ia te Ia.”*). E faamanatu mai e Satani a tatou agasala, i mea e toilalo ma lapelapea ai. E fai mai, 'E faigatā tele le olaga Kerisiano; ia lafoa'i loa!' Ae o le pepelo, 'ua le talitonu i ai. Ioe, o le upu moni e laga mai i luga e le Agaga Paia o tatou uiga toilalo, ina ia tatou manumalo ai. Ae lē faasaoina i tatou i so tatou lava lelei. *Efeso 2:* *“⁸Auā o le alofa tunoa ua faaolaina ai outou i le faatuatua; e lē mai ia te outou foi lea, a o le mea ua foaiina mai e le Atua.”* (ii) *“³Ina fetalai atu ia, ia liu areto nei maa.”* O le 40 aso faaoge na iloga ai le fia taumafa o Iesu, ina ua gaogao lona lauualo, ma amata ai e Satani ana osofaiga i le mataupu i areto. Ua ia valaaulia Iesu ina ia fai le amio masani faa-tagata, o le faamuamua ona

O AU AFIOGA LE SULU I VAE & MALAMALAMA I ALA

FETAUIGAMATEVOLO

mana'oga i lo se isi mea. E lē gata i lea, ae ia tu'imomomo ai ma'a (le foafoaga) e avea ma areto. Peitai e fa'aaloologia e Iesu maa/foafoaga; na te lē soona fa'aaogā sesē mo sona lelei. Ua Ia sauni e tu'imomomo o Ia e fai ma areto, e tofitofi e faamalie ai le galala ma le gaogao o le lalolagi. Ioa.6: ⁵¹*O lo'u tino lea, ou te avatua ma ola o le lalolagi.*” (Insight, Feb.2020). Mo i tatou, o fea se vaega o le soifuaga o loo e oge ma gaogao ai? E fia amanaiaina, e fia faaeaina, fia maua se mafutaga vavalalata? E ao ona tatou manino i o tatou itu vaivai ma folasia atu i luma o le Atua, ae le'i aumaia e Satani i o tatou luma ma fai mai, 'Tago oe e faatutumu ou mana'o, fai le mea e te iloa, ae 'aue le a'afia fua le Atua'. Leai! 'Aua e te faalogo, amanaia ma talia ana pepelo. O le soifua faalagolago tasi i le Atua, na te faatoilaloina Satani ma ana auala i soo se taimi.

(3) Mataio 4: ⁶*Afai o oe le Alo o le Atua, oso ia oe i lalō.*”

Taamilosaga Lua: Na ave Iesu e le tiapolo i le mea aupito maualuga o le Malumalu ma fai atu, ⁶*Afai o oe o le Alo o le Atua, oso ia oe i lalō; auā ua tusia, E poloa'i o ia i ana agehu ia te oe, latou te ave ia te oe i o latou lima, ne'i tu'ia lou vave i se maa.*” Na tali Iesu, ⁵⁻⁷*Ua tusia foi, 'Aua e te tofotofō i le*

Alii lou Atua.” (Teute.6:16). Ia maitau mai, e faatogafiti le siitia mai e Satani o Tusi Paia. O lea afai lua te fusu ma Satani, ia e iloa ona tali atu e pei o Iesu, *'O loo faapea foi ona fai mai le Tusi Paia'*. Na faatoilalo e Iesu le tiapolo i lona siitia sa'o o mau mai le Tusi Paia - o le misiterio lea o loo faamoemoe Satani tatou te lē mauaina. E fautuaina ai ina ia utu lau laau malosi faaleagaga i Afioga a le Atua ia lava, ma sauni lou lima e amoti pe a toe onoono atu. Ua maitauina foi le nofoaga o fai ai le faaosoosoga ina ia oso ese, oso i lalo—o le malumalu. O totonu o le Ekalesia e sili ona fiafia le tiapolo e fai ai lana galuega o le faaoso i tatou e fai togafiti, faafiafia tagata i a tatou upu ma galuega, faatosina tagata ia tuu tatou i tulaga aloaia. Na valaauina i tatou e fai ma auauna, ae lē o ni fetū e autū i ai, ia tootuli ae lē o le savali faalialia. I Peteru 4: ⁵*E tete'e atu le Atua i e faamaualuluga, a e foa'iina mai le alofa tunoa i e faamaulalo.* ⁶*O le mea lea ia faamaulalo ai outou i lalo o le aao malosi o le Atua, ina ia faamaualugaina outou e ia i ona po e tatau ai.*”

O le faaosoosoga lenei i le va o le tulaga maualuga ma le maualalo, o loo atagia ai le faamoemoe mai le amataga, o le Atua e sisila ifo i lona alofa, o lona nuu e vaavaai a'e i luga i le usitai. Ua afio mai Iesu e le'i manuia lea va nonofo ai, ona o le nuu faamaualuluga e ma'a'a ua (Esoto 32:9). Mata sa

faaosoosoina le Atua ina ia faatino lana pule i se faiga paaga e faafesuia'i tui ma faiga malo o le lalolagi (quid pro quo), ma auina mai lona Alo o se tupu ma ta'ita'i'au, ma faatū se tapuaiga na te silafia e lē faamaoni e fausia mai le fefe ma le ita. E le'i filifilia e Iesu le nofoalii o le tupu i luga, ae o leaga o le auauna i lalo e tetee atu i pulega amiolētonu, pei ona molimauina i lona soifua galue. O lenei auala ua iloa ai o Iesu ua afio mai i lalo ae lē o luga, e mai totonu ae lē mamao ese. E le'i filifili o ia e 'au faatasi ma tulaga o le 'au maualuluga, pule paoa ma malosi, ae mo le faolataga mo le au vaivai. (Insight, Feb2020). O le lē oso o Iesu i aao o le Atua e lē ona ne'i lē sapoa o Ia e le Atua, ae mafua ona na te lē tau faamaonia se mea i se tagata ae maise le tiapolo. Ia faapea foi tatou.

(4) Mataio 4: ⁸*Ona toe ave lea o ia e le tiapolo i le mauga matuā maualuga lava, ua ia faaali foi ia te ia malo uma o le lalolagi ma o latou matagofie;* ⁹*ona fai mai lea o ia ia te ia, Ou te avatua nei mea uma ia te oe, pe afai e te faapa'ū ma ifo mai ia te au.* ¹⁰*Ona fetalai atu lea o Iesu ia te ia, Ina alu ese ia oe Satani; auā ua tusia, "E te ifo atu i le Alii lou Atua, ua na o Ia lava e te auauna i ai."*

Pe a toe faaupu ona faapea lea, ua fai atu Satani ia Iesu, *"Afai e*

te auauna mai ia te au, ou te fesoasoani atu i lou faaeaina e te oo ai i le tumutumu.

Taamilosaga Tolu. Pe afai o lou naunautaiga ia viia le Atua, lona uiga o loo ta'ita'i oe e le Atua. Ae afai o le viiga o lou lava tagata, o lona uiga o loo taitai oe e Satani. Ma o le a ia fa'aogaina mai ou lagona mimita faamaualuga o i ai, auā o lona lea totonugalemū - o le faamaualuga. O lona pa'ū mai le tulaga 2 i le Lagi na muamua mai ai ana lafoga faasausili, *Isaia 14: "13Ou te alu ae i le lagi, ou te siitia i luga lo'u nofoalii ia sili i fetu a le Atua, ou te nofo foi i le mauga o le faapotopotoga i le itu i matu; 14ou te alu ae i luga o mea maualuluga i luga ae o ao; ma te tutusa ma lē Silisili ese."*

E mana'o Satani e faoa ma 'ave le tulaga o le Atua, e mana'o ina ia faaleaoaga e le Atua lana pule ma lana tausiga mo oe, ae ia manumalo atu oe ia te ia. Peitai e le mafai le Atua ona tuu atu tatou. O le upu moni e lē mafai ona tatou faatoilaloina Satani i so tatou lava malosi, ae leai se afaina. O la le Tusi, *Eperu 4: "16O le mea lea ia tatou faalatalata atu ai ma le loto tele i le nofoalii o le alofa tunoa, ina ia alofaina ai o i tatou, ia maua ai foi le alofa tunoa e fesoasoani mai ai i ona aso e tatau ai."*

Pese mai - 'Ou te tumau ma pipii mau (x 2), Satani taumafai e liliu ese a'u, Ou te tumau ma pipii mau.'

ITULAU MO TUPULAGA

"TIGA AE MANAIA HALL"

O le igoa lea o le Hall a le isi aulotu EFKS i Savaii, i Safotulafai. E tutū ai ata o le Soga'imiti i le tasi itu ma le tamaita'i ma lana malu i le isi itu - o le uiga lea o le igoa o le Hall. Soo se mea e manaia ma matagofie e tigaina lona faatinoina ae matagofie pe a mae'a. E i ai taimi e o atu ai isi faifeau ma faletua ma taliē, e fesili poo le a lea igoa faapea?

A o le tali e faamalamalamaina ai le igoa - E 8 tausaga o tau faaputupu ma galulue mafutaga a tinā o le Ekalesia e tau saili se tupe e fai ai le latou Hall. Ae uma ane le 8 tausaga na o le 10,000 le tupe na maua, ona fai lea o la latou To'omaga i le Ekalesia Aoa. Ona fau ai lea o le Hall tele ma le manaia. E i ai ma le umukuka i tua. Tau saili se igoa o le Hall, ae manatu Tinā e tigaina le tau sailiga o se tupe e faatino ai lea mea lelei ua mae'a ma tele tausaga o tau faaputupu, ma ua maua ai lea o le igoa. "E Tigā Ae Manaia Hall".

A o le uiga o le ata o le Sogaimiti ma lana pe'a, ma le tama'ita'i ma lana malu, e matuā tigaina ma sau ai le toto i le faatinoina, ae a oo ina uma o le manaia ia. E oo loa ina fai ni fiafia e sisi i luga le 'ie o le tama'ita'i e fa'aaliali lana malu ma le sogaimiti e fa'aaliali lana pe'a, e le gata ina fa'aali le manaia ma le tigaina na fai ai, ae faailoa le loto tele e onosa'i le tigā.

Tupulaga ma tatou uma lava, ia onosai le tigā e feagai ma le tau sailiga o se mea lelei ma le manaia. E tigaina le alu i le a'oga ma le to'aga e fai meaa'oga, ae a i'u ma maua se galuega, e ese le manaia mo oe ma lou lumanai. Tatou te iloa uma lava i le feagai ma galuega tetele i Aulotu ma aiga foi, e tigā le tau saili ae manaia pe a uma. Ia tatou talia le manatu, o totonu o tiga ma faigata e tupu mai ai mea sili mo oe ma au. E le maua ma le filemu se mea lelei, e maua ane lava ua e tigaina.

Ua tatou maua le faaolataga ma lou avanoa i le ola e faavavau ona o tiga ma faigata na feagai ma lo tatou Alii Faaola o Iesu Keriso i luga o le Satauro, i ona aao na tutu'i i fao ma le tao i lona itu.

Pe māmā ea ia te oe ia mea, ma tau le manatua i le gasologa manaia o le olaga o e i ai i le lalolagi? O le tagata ua ola faafifilemu, ua tau ina 'ai ma fealuai solo. O se tagata ua i ai le tino ae leai se mafaufau. "A person with a big body with no brain."

Tusia: **Solomona Tuatagaloa FT (Faifeau Toaina Penisione)**

'AUA E TE ALU IAI

Faataoto 7: "8Na ia alu ane i le ala i lona fale."

O loo faamatala e Solomona le faataoto faapea na ia vaaia *"le tasi tama ua leai sona mafaufau; 8na ui ane o ia i le ala e lata ane i le fetaulaigāala*

‘AUA E TE ALU I AI.

e nofo ai le fafine; na ia alu ane i le ala i lona fale.” O le sasi o lenei tama – o lona alu i le nofoaga sesē i le taimi sesē faatasi ma le tagata sesē. Ma e manino le feau o loo tau mai ai: Afai e te lē manao e te mū, ia taumamao ma le afi! E lē mafai ona laveia faa-mātau oe i fualaau faasāina pe afai e te lē tago i ai; e faapena foi i le ava malosi ma le ulaula tapa’a – e te saogalemu pe afai e aua e te faataitai i ai. E te lē aafia i le agasala o feusuaiga faasolitulafono pe afai e te sola mamao ese mai nofoaga sesē ma nofoaga faasāina. E faigata tele ona tatou o ese mai tagata tatou te ono pisia mai ai, e pei o tatou uo ma paaga masani. Peitai e mafai ona e puipuia oe ma laveiina lou aafia mai ai. Fai mai Matini Luteru, ‘E lē mafai ona e taofia manu felelei mai lo latou felelei i luga a’ e o lou ulu, ae mafai ona e taofia i latou mai le faia o latou faamoega i totonu o lou lauulu.’ E i ai se tasi toeaina na ia vaaia se tamaitiiti o ti’eti’e i lana uila ma faataamilo i lo latou fale mo le itula. ‘Atalii, e te lē vaivai?’ Tali le tamaitiiti, ‘O lea ou te sola ese mai lo matou aiga’. Fai atu le toeaina, ‘E te lē o sola ese, ua na o lou faataamilo lava i le auala e tasi.’ ‘Ou te sola, ae na fai mai lo’u tina, e ‘aua ou te alu i luga o le auala tele.’ O le natura o le tagata e i ai ona vaivaiga, e lilifā i le fai o mea sesē, taasē ma fia tafafao; na ala ai ona fausia e le Atua o pa puipui ma tua’oi e faasā ai i tatou mai le oo i tua ma fafo i le mea e fano ai. Aua e te alu i ai. *F.Sulu.*

UA FAI I LAGI FOLAUGA

FAAPAOLO **LOTOVALE**

11/11/24 - 10/5/2020

Na valaau le Atua ma faamanava feau a le Tina Matua ia Faapaolo Lotovale i le taeao tonu o le Aso Sa o Tina i lenei tausaga 10/05/2020. O se Aso Sa o Tina faanoanoa mo le fanau, ma le aiga lenei Aso Sa, ma o le a manatua pea le Aso Sa o Tina i tausaga taitasi, ona o le fulitua mai o le tina. O ona toe sauniga sa faia i lona aiga i Siuai i Lauili lava i le aso 18/5/2020, ona o le vavao e pei ona i ai le atunuu ona le faamai o pesia ai le lalolagi.

O a’u lava sa ta’ita’i i ona toe sauniga, ae o le Susuga i le Toeaina o le Faapotopotoga a le Atua (AOG) ia Patolo Matalasi sa faia le tatalo. O le Afioga i le Tiakono ia Leapai Pasika, o le sa’o foi o le aiga, ma o le tuagane foi i le tina na molimau faatasi ma nisi o le fanau. Ma e aua uma lava molimau o se tina e faigata, ae galue malosi mo lona lava aiga.

E fiafia lava foi e asiasi solo i mea o i ai le fanau e le gata i Apia ae o Savaii foi. Sa taua lava foi ia te ia lana tapaa, a maua lava le tapaa ua fiafia lava foi i lea aso ma lea aso. O le Afioga i le Alo o le Sa’o ia Fuamatu Tumua na faia le molimau a le Mafutaga a Tina, ma ta’ua ai o se tasi o tina matua, tina talosia o le ekalesia, ona o lona soifua ua matua, aua na ta’ua e le

fanau ua 95 tausaga o le soifua o le tina. O le molimau faa-le-agaga na fa’aautu i le upu a le fai Salamo 116: “¹²*Se a se mea ou te tau ai atu i le Alii, ona o lona agalelei mai uma lava ia te au?* ¹³*Ou te avae le ipu o le olataga ma ou valaau atu i le Suafa o le Alii.*” Aua foi e maeu lava le silisili ese o le alofa o le Atua i lenei tina ma tausaga e tele o le soifua e ui foi o se tagata e le faigofie, aemaise foi o mea e naunau i ai i le ola.

O a’u foi sa faia le upu faamafanafana, ma o le autu o lea aso “*O le Malaga ma le Faamoemoe.*” O le tala i le malaga toe foi a Iosefa ma Maria ua uma le tausamiga o le Paseka ma iloa ai ua le o i ai Iesu i le aumalaga, ona toe foi lea e saili mai, ma maua ai o ia i le malumalu i Ierusalem. O le faamanatu foi lea o fanau, ia saili mai Iesu e malaga faatasi ma i tatou ina ia mautinoa le taunuuga o la tatou faigamalaga i le ola nei. Amuia foi ni fanau e saili atu e o latou matua ae maua i le falesa.

O a’u foi na ta’ita’i i ona toe sauniga i le tuugamau. Ma o matou faatofa atu ai i le pese faatofa a le au kerisiano. “Talofa uso e, tofaina oe. Ua sau le itu po e malolo. E ala oe pe a mavae le po. Tofa, Tofa. Tofa.” Manuia lau malaga Tina.

*Saunia: Pita Toleafoa FS
EFKS Lauili
APIA I SASA’E.*

O E U A FAI I LAGI LE FOLAUGA

OLE Ā, E MANATUAAIOE?

Tani.12: "O i latou foi ua faaliliu ai tagata e toatele ia amiotonu, e pei o fetu i latou e faavavau faavavau lava." O loo faamauina faapea o le tafatolu o Giza i Aikupito se tasi o fausaga tele o le lalolagi, na fausia e le tupu o Khufu e manatua ai o ia – ae lē iloa poo ai lea tagata. O le Taj Mahal le isi maota ofoofogia na fausia e Arjumand le tupu o Initia mo lana masiofo, e lē manatua foi nei tagata. O le Pa Ta'uta'ua o Saina e iloa mamao mai i le vateatea, ae leai se tasi e manatua Qin Shihuang na faia. Ua galo i le lalolagi nei tagata, peitai e mafai ona e faia se maa faamanatu tumau mo oe. E faapefea? Ina ua e ta'ita'i tagata ia Keriso!

O le alii fomai o Louis Pasteur na soifua mai le taimi na maliliu ai le faitau afe o tagata mai le faama'i o le Rabies. E tele tausaga o galue i le fausia o le vailaau mo le tapēina o siama (immunology); ua oo i le taimi e faata'ita'i ai ia te ia, ae maliu loa le tamaitiiti 9 tausaga o Joseph Meister na utia e se ta'ifau. Na talosaga le tina o Joseph ina ia faata'ita'i le vailaau i lana tama, ona fai lea o ona tui mo le 10 aso – na toe malosi ma maloloina ai. Ina ua maliu le alii foma'i, na ia filifilia upu nei e tusia i lona Maa Faamanatu – NA OLA JOSEPH MEISTER. O lou talaaga silisili o i latou ua ola faavavau ona sa e faasoa atu Keriso ia i latou. *Ioa.6, "63 O upu ou te fai atu ai ia te outou, o le agaga ia, o le ola foi ia." O le ā na te faagaetia loto? O le ā na te suia olaga o tagata? O afioga, upu ma fetalaiaga a Iesu! FSulu.*

SA FAAFOUINA EPATI SETEFANO.

13/10/1959 - 23/4/2020.

O Sa Faafouina o le Faletua o le Faifeau Nofoaiga, Susuga Epati Setefano. Na soifua mai i le nuu o Falevao, ae maliu i lona aiga i Se'ese'e (Lepea), ua atoa i ai le 60 tausaga 6 masina, ma aso e 10 o lona soifua. O le aso 12 Aperila 1979 sa fa'aipoipoina ai e le Susuga ia Malele Pitoitua (FT) i Faatoia, ua atoa ai le 41 tausaga 21 aso o le mafutaga. Na ulufale i Malua i le 1987 o sui o le Matagaluega Apia i Sasa'e, ae faai'uina le taumafai i le 1990.

O le aso 30 Ianuari 1991 sa galulue tausinu'u ai i le EFKS Fa'ala Palauli. Na tu'ua le galuega i Fa'ala i le aso 6 Tesema 2003, ua atoa le 13 tausaga. Na foi mai ma nonofo i Se'ese'e i le aiga o **Ina** ma tautua ai e ala i le Aulotu a Lepea, Pulega Faleata i Sasa'e. O le masina Oketopa 2004 - Ianuari 2005, na ma vaaia ai le Aulotu i Aleisa i Sasa'e ina ua malolo le faifeau i aiaiga masani a le Ekalesia. Ao le tausaga e 2015 (Ianuari – Setema) na vaaia ai le Aulotu i Lepea ina ua alu le malologa tolu masina a le faifeau. O Ina o se tinā e mafanafana lana mafuta i le Atua. E to'aga e tatalo, e loto tele, e faatuatua, e fa'amaoni. E moni lona alofa i le Atua ma lana galuega. Na te le'i faamaumuina se avanoa e tu'uina

ia te ia pe a tofia e ta'ita'i i se sauniga lotu a tinā a le mafutaga i le aulotu i Lepea, lotu tinā Pulega e oo lava i le Matagaluega. E matua tapena, suesue ma sauni i ai. E to'aga e ave lana fanau laiti (grand-children) i le A'oga a le Faifeau, i taimi e tapena ai le lotu a tamaiti ae maise o le A'oga Aso Sa, auā o ia o le faia'oga Aso Sa sinia. E pele i ona loto lana mafutaga a tinā aemaise si ona tinā o Asofiafia. E mitamita i le aufaipese a lona nuu ae maise o le fiafia ia Junior Faavae ma le faafoeina o le galuega faa-asafu. E le galo ia INA lana fanau faaleagaga sa faafailele a o galulue i Fa'ala, ua i Niu Sila nisi, ua i Amerika nisi faapea foi mo Ausetalia. E tolima(5) le fanau a Ina, e 18 le fanau a fanau o le aofaiga o e na tutupu mai ia te ia e 23.

O lona toe sauniga i lona maota ma lona aiga i Se'ese'e na saunia lava e lana faifeau, susuga Esekia Peneueta (FS) i le 7.30 o le taeao o le Aso Tofi 30 Aperila 2020. Ona faai'u lea i lona oliolisaga tumau i lona aiga lava i Se'ese'e. Sa faatino uma lava ona toe sauniga e tusa o le Poloaiga S.O.E mo Puipuiga mo le Saogalemu, mai le Faama'i Covid-19. Ona faamavae ai lea ia te ia i le Pese 268, "Talofa uso e, tofaina oe". MANUIA LAU MALAGA **INA. TATOU TOE FEILOAI.** *Saunia: Epati Setefano FNA EFKS Lepea, FALEATA.*

O E UA FAI I LAGI FOLAUGA



**SA FAAFOUINA
EPATI SETEFANO**



FAAPAOLO LOTOVALE

SA'AFI'AFIGAMO E UAMALILIU.



**MAOTA PULEGA
GAGA'EMAUGA
I MALUA**

*Ua fai i lagi le tuligasi'a a le Aiga Sa Tagaloa
Ina ua a'e malo le faiva, ua malo tau malie toa
Sa tautiga mo Iesu, a o alo faiva i tiute ma tofi
Lenei ua mapu ane teisi, ina ua pule mai le oti
Sa outou faatuatua, na onosai ma le faamaoni
Ua outou selesele le tau, e ulufale ma le olioli
Amuia outou ua muamua, ua mapu foi mai tiga
Ua aga atu i le nuu moni, e le toe i ai se pogisa
O loo faatali mai le Alii o Iesu sa outou tautua
Na te faafeiloai, e faa'ula ma faapale tou soifua
E tofia outou e pule i lona malo faatasi ma Ia
Le malo e mamalu o le Tamai Mamoe na fasia.
Faatasi ma isi uso ua outou saofaga faatasi ai
Na o pesega ma viiga, o faaneetaga le mea e fai
Tou te vaai i fofoga o Iesu i aso uma e le aunoa
E faalogo i Lona siufofoga alofa pe a Ia saunoa
Ia malie afenoa pe afai tou te le toe mafuta lelei
Ma e sa pele i loto ma agaga i le olaga i lalo nei
Ona o aiaiga o le Malo o le Lagi ua uma pasia
E le toe fai ava pe nofo tane, ae o agelu filifilia
Siomia le nofoa o le Tama le Alo & Agaga Paia.
E.Sulu*